

ՍԱՐԳԻՍ ՀԱՐՈՒԹՅՈՒՆՅԱՆ. Հայ առապելյաբանությունը. Բեյրութ, 2000, էջ 527:

Որքան էլ ոտնձգությունները տևական՝ Հայագիտությունը Հայաստանի գիտությունների ազգային ակադեմիայի հիմնադրման օրից թափ առավ, և 60-ականների շեմի սերնդափոխությունը ևս նշանավորվեց ու նշանավորվում է նորանոր հիմնարար հետազոտություններով:

Տվյալ դեպքում խոսքը վերաբերում է բանահյուսությանը:

Հայտնապես Մ. Արեղյանի ավանդներով էպոսագիտությունը հարստացավ մեծաքանակ նոր պատմամեթոդով ու նշանակալի դիտարկումներով, պատշաճ մակարդակով իրագործվեց Հայոց հեքիաթների բազմաՀատոր հրատարակությունը: Միաժամանակ նպատակամետ ճշգրիտ կողմնորոշումով հունավորվեց բանահյուսական ժանրերի ուսումնասիրությունը՝ պսակվելով հիմնարար լիարժեք հետազոտություններով: Ամեն դեպքում գիտական համրահանուր առաջընթացի հիմունքներով և ուղղվածությամբ ինչպես ժանրերի բնագրերի հրատարակության, այնպես էլ համակարգման ու մեկնաբանության առումով:

Արդյունքում արդեն իսկ 1960-ին և 1969-ին հրատարակված բազմավաստակ Արամ Ղանալանյանի մեծարժեք «Առածանին» ու «Ավանդապատումը»... և ուղագրավ է. «Առածանին» կողքին միաժամանակ հրատարակվում է Սարգիս Հարությունյանի «Հայ ժողովրդական հանելուկներ» թեկնածուականը՝ վկայելով ուսուցչի ու նորամուտ սանի դիտական համատեղ առաքելությունը՝ բանագիտական լայն շրջանակով: Բնորոշ է, որ այնուհետև նույն խորագրով ու եռակի ծավալով հանելուկները վերահրատարակվում են Մ. Արեղյանի ծննդյան 100-ամյակին (1965) նվիրված, այս անգամ էլ հաստատելով սկսած գործը մինչև վերջ, ամբողջ տարողությունը քննականորեն հետադոտելու Հարությունյանի գիտական ինքնակա կամքն ու առաքելությունը:

Այգու. հետևում են բանահյուսությանը, Հայագիտությանը, բանագիտական մտքի պատմությանը նվիրված նրա աշխատությունները: Այդ թվում Մ. Արեղյանի կյանքի ու ժառանգության համակողմանի քննությունը առանձնացող մեծագրությունը՝ ի հեճուկս և ընդդեմ աղքատիմացների տևական քարկոծումների... որը երիտասարդ Հարությունյանի բնատուր կարողությունների պարագայում նշանակում էր անցնել Հայագիտական տիտանական դպրոց:

Եվ ահա՛, գիտական լիարժեք տեսադաշտով, տեսական հիմնավոր գիտնոցով հետևում են Հայոց «անտիկյան» բանահյուսության ժանրային բազմաՀարուստ շարքի Հարությունյանի հետազոտությունները: Ուրեմն և հիշենք ու պատկերացնենք, տասնամյակներ շարունակ տքնալան աշխատանքով նրան զօր ու գիշեր զբաղեցրած ժանրերի շարքը. առապել, էպոս, հմայական աղոթք, երգ, հանելուկ, անեծք, օրհնանք, երգում: մեկը մյուսից տարբեր ժանրային հատկանիշներով, արտահայտչական ձևերով ու երանգներով, ենթաժանրերով ու ենթապատմամեթոդով առնչակցական կարգով՝ նաև առածանինի, հեքիաթների ու ավանդապատումների հետ. առանձնակի և ընդհանրական դիտարկումներով ու բացատրություններով, և ամեն դեպքում բանահյուսական ընդհանրականի ազգային կայուն ու հաստատուն հենք ու հենասյուններով: Ասել է՝ ըստ ամենայնի պատկառելի շարք՝ բնագրային հրատարակությամբ և հետազոտությունը ազգագիտության դասական չափ ու չափանիշներով:

Խոստովանանք լինի, այս կամ նման կարգի գիտական զնահատության ու մշակութային հնչեղության պետք է որ արժանանար տակավին 1975-ին հրատարակված Հարություն-

յանի «Անեծքի և օրհնանք ժանրը Հայ բանահյուսության մեջ» մեծարժեք մեծագրությունը: Բայց, դե՛, չափանիշների այս երկարակյաց խառնաշփոթում, երևի թե, կարելի է և ներող լինել... Եվ ափսոսանքով անցնել վերջերս Բեյրութում լույս տեսած իր «Հայ առասպելաբանությունը» ստվարածավալ մեծագրությունը՝ փորձելով գրախոսական կոչվածի ընձեռած սահմաններում ինչ-որ չափով ներկայացնել այդ բառացիորեն անգնահատելի հետազոտության տարողությունը, բնույթը, բազմաբովանդակ էությունը, պարզապես համագրային-համամարդկային հավիտենական կենսականությունը:

Ուրեմն և սկսենք. ըստ ամենայնի ճարտարապետորեն մտածված-նախագծված կառուցվածքից ամբողջականի մեկը մյուսին սեպվող հերթականությամբ:

Գլուխ առաջին. «Ալխարհի տեսքի և կառուցվածքի առասպելները», որ բնականաբար ծայր է առնում աշխարհի երկինք, երկիր և (ծիրանի) ծով եռամասն կազմությամբ՝ վերջինիս «Ստորին աշխարհի քառասյին Ան ջրի աշխարհակործան պատկերացումներով» հանդերձ: Եվ եթե այդ պատկերացումների շարքը մեծապես մատուցվում է «Սասնա ծռերի» մոկաց և այլ պատումների համագրումով, ապա աշխարհի յոթնահարկ, իննահարկ կառույցներում արդեն վկայակոչվում են ավանդապատումային և այլ պատկերացումներ: Այդ թվում հանրահայտ «Յոթերորդ երկնքում է» գործվածը, «Իբրև ամենաերևելի» վիճակի արտահայտություն, ուղղակի իմաստով՝ իբրև երկնքի ամենաբարձր աստիճանի մասին պատկերացում (էջ 12):

Հասկանալի է, այս՝ ինչպես և բոլոր դեպքերում, պատկերացումները ընտրվում-հիշատակվում են համեստի կարգով, և կարելի է թե հաճախ բանագետ Հարությունյանի հեղինակային բնագրում ունեն տասնյակից ավելի պատկերացումներ վերաբաղված ինչպես տարբեր ժանրերից, այնպես էլ տարբեր սկզբնաղբյուրներից: Ինչպես, ասենք, առաջին գլխում «Տիեզերական սյուն և ծառ» աշխարհակենտրոնի պատկերացումները քննականորեն դիտարկելիս, երբ վկայաբանական տվյալները հանելուկներից ձգվում են մինչև հմայական աղոթքներ, միջնադարյան ծիսերգեր ու մանրանկարներ... ձկնակերպ Վիշապ քարակոթողներ... այլև ճարտն աշխարհի կենտրոն «Սանդարամետ անդնդոցի կամ դժոխքի բերանը փակող Ս. Կարապետի ամրություն ու վանք... քրիստոնեական դժոխքատեսլային հրեղեն սյուները՝ բլրաչափ խարխիսներով կամ լեռնազագաթներով: Այդ թվում Մեծ Մասիսը՝ Այրարատում... Ահա այսպիսի մինչև «Կենաց ծառ» աղեղով շրջանառության կոչված պատկերացումներ՝ տասնյակ տարբերակներով իմաստավորված բազմապիսի սկզբնաղբյուրներով. Աստվածաշունչ, Ազաթանգեղոս, Խորենացի... Բյուրակն, Ազգազրական հանդես... Արվանձտյանց, Աբեղյան, Լալայան... Մատենադարան ձեռ. թիվ 15, Գարիկյան. Мифы, Елизаренко, Топоров... Մնացականյան, Նավասարդյան... և այլք: Իրոք, նյութի ապացուցիչ իմացություն ու տիրապետում, որպիսիք առանց չափազանցության վերաբերում են մեծագրության բոլոր գլուխներին ու էջերին:

Հերթական «Աստեղային առասպելներ» եռամասն գլուխը՝ երկնայինների թեկադրանքով երեք դեպքում էլ ծայր են առնում և վերջավորվում անունների ու անունաձևերի հոլովում-ստուգաբանությամբ: Սկսած արևայինից՝ Արեգ նախաձևով և իմաստաբանական աղբյուրներով. որպես լուսատուն-լուսատու, Հայոց ութերորդ ամիս համեմատությամբ հնդեվրոպական ու վեդական նախաձևերի, ապա և պարսկերենի, վրացերենի, արաբերենի: Դարձյալ բազմապիսի հղումներով, այդ թվում Հ. Աճառյանից վերաբաղված մի հատված, ըստ որի Մ. էմինը՝ հնդեվրոպական, իրանական, հունական, հին գերմանական, եգիպտական ավանդույթների համեմատությամբ՝ «... «արեգակն» մեկնաբանում է իբրև «Արեգի աչք», Արեղը դիտելով իբրև հին Հայոց աստված». և որ «Ակն» բաղադրիչն ընկալվել է նաև «քար, թանկագին քար» առումով». և որ Ն. Շնորհալին, օրինակ, արեգակն անվանում

է «պայծառ կարկեհան» (նունաքար) ...Համեմատելի «Հյուսիսային գերմանացիների՝ արեգակին տված «Kimsdein Himins (= երկնային գոհար) անվան հետ» (էջ 41): Որտեղի՞ց որտեղ...

Ապա քննականորեն դիտարկվում են արևի անձնավորումները՝ թռչնակերպ, առյուծակերպ, մարդակերպ՝ պատանի, մանուկ, արև ու լուսին՝ քույր-եղբայր... միջազգային դուրահաններով. արդյունքում համոզիչ փաստարկներով համարվում ոչ թե «պատահական նմանություններ», այլ «ծագումնաբանորեն մայրական նույն աստվածացված նախահիմքից եկող» (էջ 48) իրողություններ:

Արևը որպես կենաց խորհրդանիշ ու պաշտամունք համակարգային քննության առումով արդեն ի լրումն նախորդ հղումների, վկայակոչվում են նախապատմական ժամանակներից սերնդե-սերունդ մեզ հասած հարյուրավոր նմուշներ: Հմուտ հետախույզի անվրեպ զգացողությամբ Հարությունյանը մատուցում է մեկը մեկից մարգարտաշար անգնահատելի հյուսածոներ. որպես երգում, որպես օրհնանք ու անեծք, առած-ասացվածք, աղոթք, նզովք-ճշգրտորեն ժանրակարգված տեսականիով, դարձվածներով, փոխաբերական այլացում-այլաբանություններով: Հիրավի, ինչ գին տանք վաղնջական հնադարից ժողովրդի միջավայրում բնավորված ծառ ու ծաղկի և արեգակի նմանությամբ հյուսված «Ծաղկոց առածի» (թաղավոր-թագուհի=փեսա-հարս) ծիսական գերապրուկին. կամ նույնպիսի նմանությամբ Հայր Ալիշանի թվարկած արեգակնային ծաղիկներին, և դրանց կողքին էլ «Արեգակն արդարության» անճառելի խորհուրդին... Հիրավի մարդկային երևակայության՝ ասել է պատկերավոր մտածողության որպիսի միասեռ-անմիասեռ անեզր թռչքներ:

Եվ այսպես Բուզանդից ու Խորենացուց՝ Գր. Մագիստրոս, Ն. Ծնորհալի, Դավիթ Սալուստորցի... և մշտապես Մ. Աբեղյան... սկզբնաղբյուրային և քննական-հետազոտական տվյալների զուգակցությամբ շարունակելով՝ Ս. Հարությունյանը ներկայացնում է Հայոց արևային-լուսնային գումարած «Աստղերը և համաստեղությունները» առասպելների շարքը: Եվ սակայն շրջանցելով ըստ ամենայնի հանգուցային շատ ու շատ կարևոր արժեքավոր բացատրություններ, գիտարկում-մեկնաբանություններ, դարձյալ ծաղկաքաղով, բայց և առանձնակի միտումով պետք է անդրադառնանք համաստեղություններից ամենաառասպելաբանականին՝ «Ծիր կաթին» կամ «Հարդագողի ճանապարհ» կոչված աստեղային միգամածություններին¹: Հունական ծագումով միևնույն՝ իբրև «որևէ արարքի հետք» իմաստով, որ արձանագրվում է՝ «մի գեպքում կաթի հետք, մի այլ դեպքում դողացված հարդի, երրորդում ջրհեղեղի ժամանակ երկնքի պատռվածքի» հետք առումներով: Եվ եթե առաջին դեպքում մեզ հասած եզակի վկայությամբ Հերայի հետ համեմատությամբ («կրծքի կաթի») նշվում է «ինքնատիպ» մեկ հորինվածք, երկրորդ՝ «գողացված հարդի հետ» արձանագրվում է ճշող մեծամասնություն: Բնականաբար, հաջորդում է իմաստաբանությունը՝ սկզբնաղբյուրից սկսած. այն է՝ Ան. Երևակացի, որը «աստղաբույր կապում է Հայոց Վահագնի և ասորական Բարշամ աստվածների հետ, որոնք ոչ թե աստվածներ են կոչվում, այլ Հայերի և ասորիների նախնիներ»: Իսկ վկայություն-վկայաբանություններն արդեն ավանդապատումային բնույթի են. Ս. Սարգսի պահքի, ուղտ-ուղտապանի հարդի, քամու, ջրաղացից այլուր գողանալու և այլ մոտիվներով, Օրինոն, Մարս և այլ համաստեղությունների հետ առնչակցությամբ և վերաքաղումներով Սրվանձտյանի, Սլիշանի, Աբեղյանի վկայաբանություններից, ինչպես և «Սասնա ծռերից»:

¹ Որքանով ի սկզբանե արև-լուսնի հետ աստղերն ու աստեղային համաստեղությունները անբաժան են Հայոց բանաստեղծությունից:

... Ես կես գիշերին երազ մ'տեսա՝

Մտրա աստղն մութն խավար էր,

Սասնա աստղն լույսն պայծառ էր (էջ 76),—

կամ հակառակը: Եվ համակողմանի քննությանը հետևած համոզիչ եզրակացությունն այն է, թե՛ վկայակոչված նմուշները ժանրային առումով՝ «առասպելներ չեն, այլ ստուգաբանական ավանդազրույցներ, որոնք արդյունք են աստղերի նկատմամբ մարդկանց ունեցած սոսկ արտաքին վերաբերմունքի մարդկային սխալմունքի կամ շփոթության, որ հիմք է ծառայել աստղերի անվանադրման» (էջ 77):

Դժվար չէ գուշակել, որ գործ ունենք ժանրային որոշակի ենթատեսակի հետ, որը և հատկանշային խորունկ զգացողությամբ սահմանում է Հարությունյանը: Եվ այդ ոչ միայն այս, այլև ժանրային հատկանիշների խառնածին-խաչավորվող այլևայլ ենթատեսակներ բնութագրել-սահմանել-բանաձևելիս: Մանավանդ ուսումնասիրության երրորդ րատ ամենայնի ծավալուն «Օդեոկուլյթի առասպելները» խորագիրը կրող երկմասնյա գլխում:

Արդ. սխալված չենք լինի, եթե ասենք, որ աշխարհի եռամասն կազմության այս վերջին՝ (ծիրանի) ծովին վերաբերող գլուխը հետազոտողից պահանջել է տրամաբանական աներևակայելի լարում՝ նյութի հատկանշային խմբավորման, դասադասման և մատուցման կառույցի ձևավորման շեմին: Որը և կարգավորել-լուծել է հենց նույն մակարդակում: Այն է՝ առաջին «Մթնոլորտային երևույթներ» վերնագրով մասում նախ ծանուցման կարգով ներկայացվում են նյութի ընդգրկման սահմանները. երկրորդում արդեն՝ լայնատարած դաշտով առանձին ենթագլուխներով այդ ամենը ենթարկվում է տիպաբանական-իմաստաբանական հանգամանալի մեկնաբանության: Եվ այսպես վերաբաղենք «ծանուցումից» որոշ տողեր. նախ՝ «մթնոլորտային երևույթները՝ ամպ, ամպրոպ, կայծակ, փայլակ, փոթորիկ ու հողմեր, ձյուն, կարկուտ ու անձրև» և ապա գեղարվեստական վաղնջական արժեքը որն է՝ «իրենց հետևանքներով հնուց անտի խոր ու անջնջելի տպավորություն են թողել ժողովուրդների բանաստեղծական երևակայության վրա, հիմք դարձել տարբեր պատկերացումների, հավատալիքների, առասպելական գրույցների ու երգերի, ծիսապատմունքային արարողությունների» (ընդգծ.՝ Ալ. Ջ.) (էջ 78):

Ընդհատենք ու ասենք, որ վերաբաղված և ընդգծված տողերը տարբեր-տարբեր առումներով, հղովումներով ու հուշարարությամբ ուղեկիցն են մենագրության հաջորդ և անցած բոլոր գլուխների ու էջերի: Ասել է թե՛ նաև սույն գրախոսականի, որը պետք է որ վերջավորվի՝ միանգամայն օրինականորեն ի փառս ին. Աբովյանի ու Հայր Ալիչանի, այլև Մ. Նալբանդյանի... Առաջժմ...

Ընդհատենք և դառնանք այդ երրորդ գլխի «Ամպ և ամպրոպ» և «Ամպրոպածին հերոս և վիշապ: Ամպրոպային կոիվ» պատկերացումների քննությանը: Համապատասխանաբար «Սասնա ծառ» – Մովինար և Վահագնի ծննդյան գողթանյան երգ առանցքով ու հարաբերակցությամբ: Ուրեմն և՛

Երկնէր երկին, երկնէր երկիր,

Երկնէր և ծովն ծիրանի...

և հետևում են հմուտ մեկնաբանի խորախորհուրդ դիտարկումների նախ առաջին աստիճանը. այն է թե՛ «Տիեզերական այս երեք բաղադրիչներից... Հայոց առասպելներում առավելությունը տրված է ծովին, իբրև ծնունդ սկզբունքի, քանզի նրա մեջ է գտնվում բոցավառվող եղեգնը, որի փողից բարձրացող ծուխ ու բոցերի միջից ծնվում է ամպրոպային հրեղեն պատանի աստվածը»: Ապա և հաջորդ՝

Երկն ի ծովուն ունէր և զկարմրիկն եղեգնիկ.
 Ընդ եղեգան փող ծուխ ելանէր,
 Ընդ եղեղան փող բոց ելանէր,
 Եւ ի բոցոյն վաղէր խարտեաչ պատանեկիկ,–

Քառատողի իմաստավորումով Հետեւում է եզրակացությունը. «Ուրեմն, ամպրոպային աստծուն ծնող մայրը այս հնավանդ առասպելում՝ Միրանի ծովն է (հանելուկի՝ Արյունա-ծովը), որի անվանական անձնավորումը ծովային կույսն է՝ Մովյան-Մովյալ-Մովինարը» (էջ 83): Հաջորդում է ծովայինի կենդանակերպ ու մարդակերպ տարբերակների քննությունը՝ նորագույն Հայեցակարգով, հանգելով ամպրոպաջրային տարբերքի (խոնավություն) ի-դական (հղիացած ծիրանի ծով, այծ, կով, կույս) սկզբունքին. նշանավորելով մտածողութ-յան մշակութատիպաբանական զարգացման տարբեր՝ բնակերպ, կենդանակերպ ու մարդա-կերպ աստիճաններ: Միաժամանակ ամրապնդելով Մ. Աբեղյանի այն տեսակետը, ըստ որի «...Ամպրոպային մրկալից ամպը, հողմահույզն ու որոտը հնդեվրոպական հավատալիքնե-րով երկունքի արտահայտություն են, որին հետևում է լուսեղեն մեկ կամ երկու էակի ծնունդը» (էջ 84):

Նույնը տեսնում ենք «Ամպրոպային Հերոս և վիշապ: Ամպրոպային կռիվ» հարցադ-րումներով Հետազոտվող պատկերացումներին նվիրված էջերում: Ավեստա, Շիրակացի, Ա-լիշան, Սրվանձտյանց, Աբեղյան... և իր իսկ Հարությունյանի արձանագրած տասնյակների հասնող հանելուկներ, որոնց հենակետերով ծավալվող վկայաբանություններն արդեն ու-նեն մեծապես լեզվակապակցական-ստուգաբանական բնույթ: Ըստ ամենայնի հիմնավոր, որքանով Աբեղյանի հետևությունները Վահագնի վիշապաքաղ մակդիրը վերծանվում-հաս-տատվում է որպես վիշապահանող, վիշապ ժողովող իմաստով՝ այլևայլ հոմանիչներով Հան-դերձ:

Ինչպես տեսնում ենք, որքան էլ Հնարավորությունները սուղ, սույն հարցերի շուրջը խոսակցությունը երկարում է, և պետք է որ երկարի: Քանի որ «Օդերեւույթի առասպելնե-րը» էպոսն է Հարությունյանի մենագրության ամենակենտրոնածիղ հանգույցն են: Մանա-վանդ երկրորդ ծավալուն մասով՝ որ կարելի է պատկերացնել ելնելով հենց «Ամպրոպային աստծո կերպարի և վիշապամարտի առասպելի տարբեր դրսևորումները Հայ վիպական ավան-դություն մեջ» վերնագրից՝ սույն բաժիններով հանդերձ. «1. Targu, Tarhui, Tarhuot, Տար-բուն, Տարուն, Տորք 2. Perua, Perwa, Peru(n)t, Երուանդ 3. Մուշեղ, Մուշ, Օձ և Վիշապ քա-ղաք, 3. Դեմետր և Գիսանե, Իննակնյա տեղիք, Սուրբ Կարապետ»:

Ընդունենք, որ այսքան վիթխարի տարողության էականը անհնար է ներկայացնել նույնիսկ, այսպես ասած՝ գույզն-ինչ. ուստի փորձենք կցկտուր տարբերակը՝ Աարգիս Հա-րությունյանի, բայց և նվաստիս վերին նախասիրությունը ընտրելով՝ Տարբուն, Տարուն, Տորքից... Սուրբ Կարապետ տանող-հասցնող զիգզագներով: Ակսելով այնտեղից, որտեղից սկսում-արձանագրում է Հետազոտողը. Ջևսին ձայնակցող Տարբուն, Տարուն, Տորք դիցա-նուն՝ Հաթերեն, Հեթիթների և լուվերների միջինասիական տարբերակներին արձագանքող գաղափարազերեր, ինչպես և հինանատուրական և հնդեվրոպական այլ լեզուների համեմա-տությունները «Հալթեի» բայարմատով դիցանուն՝ փոթորկի կամ ամպրոպի աստ-ված նշանակությամբ: Ապա ուղիղ գծով Խորենացու վկայած՝ Տարբուն, Տորք կամ Տուրք... Տարուն (Տարոն) գավառ... Տարուն դիցուհի քաջ, գեղեցիկ, ճարտար հեծյալ... ապա՝ Տա-րոն լեռ՝ Սասնա լեռան նոր կոչումը. Տիրանուհու պատմություն և Խանդուլի գրույցի նմանություն (էջ 92–93)... և այլն: Իրոք, դժվար է պատկերացնել Հարությունյանի քննա-կան հղումների, շրջագիծ-եղրագծերը դիտական իմացությունների և էքսկուրսիների՝ մի

կողմից սկզբնաղբյուրների, մյուսից նման հարցերով ու տարածքով առկա հետազոտությունների քարտեզը...

Ուրեմն և լայնահայաց-խորախորհուրդ գիզգագներ շրջանցելով՝ բավարարվենք եզրակացություններով: «...բնավ պատահական չէ փոքրասիական ամպրոպի ու փոթորկի աստված Դարսի անվան հիշատակի առկայությունը Տարաւն-Տարօն տեղանվան մեջ, հայոց բնաշխարհիկ մի գավառ, որը կենտրոնն էր հայոց ամպրոպային աստծո պաշտամունքի: Հետևաբար, կարելի է որոշակի հավաստել, որ առնվազն մ.թ.ա. II հազարամյակի երկրորդ կեսերին, երբ Հեթիթական լեզուն ու քաղաքակրթությունը իր ոլորտն էր ներառել բուն Տարոնը, վերջինս դառնում է Հեթիթների Դարսու գլխավոր աստծո պաշտամունքատեղիներից մեկը» (էջ 103):

Եվ այսպես, իմաստաբանական-վկայաբանական-ստուգաբանական... բոլոր սլաքները կիզակետային ուղղվածություններ սկսելով են «Օդերևույթի» ամպրոպային Վահագն վիշապաքաղի առանցքին: Անտիկ, Հեթանոսական, քրիստոնեական աստվածների ու քրմերի, սարերի, բերդերի տեղանունների պատկերացումներ. Հերմես, Ապոլոն, Ռիզվեդա ... Արամազդ, Աստղիկ... Վարդավառի տոնախմբություն... «Տարոնի պատերազմ» ու «Պարսից պատմություն»... Երվանդի առասպել... Հովհան Մկրտիչ... Ճերմակաձի Մուշեղ, Մուշ, Մշո սուրբ Կարապետ... ապհեցուցիչ նպատակամետություններ տեղին-ժամանակին անհրաժեշտությամբ և դիպուկ նշանակետով շրջանառության կոչված ու ներքաշվող ամեն կարգի ու ժանրի հարյուրավոր վկայություններ՝ համադրում-հարաբերումներով, առնչակցությամբ, զուգորդում-խաչավորում-համեմատություններով, տրամաբանական կուռ, շղթայակապ կուռհումներով լիարյուն-լայնահայաց հանգուցալուծումներ:

Եվ բոլոր ճանապարհները տանում-հասցնում են Տաբու ամպրոպային աստված... Մշո սուրբ Կարապետ դիվամարտիկ. ի վերջո սրբազան Տարոն աշխարհ-Տիգրան մեծ-Տիգրանականեր...

Ուրեմն և «Օդերևույթի առասպելները» մեծածավալ գլուխը Ս. Հարությունյանը վերջավորում է սույն եզրակացությամբ. «Այս բոլորը պատահական չեն և Հիմք են տալիս պատմագիտական մի կարևոր հետևություն. հայ ժողովրդի ազգածագման վաղնջական կենտրոններից մեկը հավանաբար եղել է Տարոնը իր բնիկ հնդեվրոպական նախաշերտով, մի հինավուրց բնակավայր, որ մ.թ.ա. II հազարամյակի կեսերից ի վեր կենտրոնացված է եղել հնդեվրոպական ամպրոպային աստծո պաշտամունքն իր առասպելներով ու ծիսակատարությամբ, որը հայ ազգի ծագման ժամանակներից ի վեր գոյատևել է նրա պատմական կյանքի ողջ ընթացքում, ստույգ վկայված՝ վաղ միջնադարից, ի դեմս հայոց հոգևոր կենտրոն Աշտիշատի և այնտեղ կատարվող ամենամյա վահեվանյան տոնախմբությունների, իսկ քրիստոնեական միջնադարում մինչև նորերս՝ իննականյա տեղերում կառուցված Ս. Կարապետի եկեղեցու (Գրիգոր Լուսավորիչի հիմնած՝ Ալ. Զ.) և Վարդավառի նավասարդյան տոնախմբությունների:

Հայոց հոգևոր կենտրոնները պատմական տարբեր ժամանակաշրջաններում մի քանիսն են եղել. վաղազույններն են Անի-Կամախն ու Երիզան՝ Դարանաղիում ու Եկեղյաց գավառում, Արմավիրը՝ Արարատյան դաշտում, Բագարանը՝ Բագրևանդում, բայց ոչ մեկն այնքան հարատև չի եղել, որքան տարոնի Աշտիշատն ու Ս. Կարապետը: Եվ առհասարակ, մեր խորին համոզմամբ՝ Հայերի ազգածագման օջախները պետք է փնտրել հնագույն ու ավանդական կենտրոնական սրբավայրերի միջավայրում, որոնք մշակութային հուսալի կանխանիչներ են ազգի գոյացման վայրերի հին Հիշողության, դրանց սրբագործման և պաշտամունքատեղիների վերածնման» (էջ 194-195):

Հիրավի, ճշգրիտ շեշտադրումներով «պատմագիտական հետևություն» և մշակութային ուղեցույց, որի ելակետերից էլ Հարությունյանը քննական վկայաբանություն սահմանում է վաղնջական կայուն-անսասան պատմական նախաշերտեր: Հայտնապես, ինչպես Ս. Կարապետի պաշտամունքի և մշակութային օջախի պարագայում, որը քայլ առ քայլ ներկայացվում է մեկ որպես «Արբերաց զոր ու զորպետ», մի այլ ավանդությունում «Մշո սուլթան Սուրբ Կարապետ» «կայուն մակդիրով» ասել է ըմբռնվելով որպես Մուշ կամ Տարոն աշխարհի «տեր ու տիրական»: Ավելի ուշ ժամանակներում (XVII–XVIII դդ.)՝ «Սուրբ Կարապետի կարողությունով» համարվում է գիտություն և իմաստություն, բանաստեղծական և երաժշտական արվեստի ձիրք շնորհող. մինչև իսկ շնորհող սիրահարի, որի ներշնչանքով ոչ այլ ոք՝ ինքը Սայաթ-Նովան, որ ցանկանում էր «ուխտի գնալ Սուրբ Կարապետի վանք և դառնալ նրա նվիրյալը»:

Մի խոսքով իր պաշտամունքային վարք սրբոցով Հարությունյանի ընդհանրական ընկալումով՝ «Սուրբ Կարապետն արվեստների ձիրք պարգևելու, հովանավորելու, գայլից ու գազաններից պաշտպանելու, տարբեր հիվանդություններ բուժելու, սիրո փափազը կատարելու, իրեն նվիրյալ հավատացյալներին օգնելու, նրանց հայրենիքը պաշտպանելու գործառնություններով սինկրետիկ սուրբ է, բազմագործառնյալ մի հեթանոսական աստվածություն, որը շատ գծերով նմանվում է ամպրոպային Վահագնին, Տիրին, հունական Ապոլոնին և Հերմեսին» (էջ 157):

Եվ այստեղ էլ հենց այսչափ կցկտուրով վերջավորենք «Օղբերույթի առասպելների» մասին խոսակցությունը և անցնենք «Բնատեսքի առասպելներին»: Անցնենք՝ շեշտելու մտքով Ս. Հարությունյան բանագետի «սինկրետիկ» անձնականության բաղկացուցիչներից մյուսը. ասել է՝ Ս. Կարապետի զարմապատկան մարդկային արտիստիկ խառնվածքը՝ խոհականին ձուլված գեղարվեստական խորունկ զգացողությամբ ու ճաշակով: Մարգկային բնածին անկապտելի ներգգածական հատկանիշներ, որպիսիք, երևի թե, ինչ-որ չափով զսպում-խնայում էր նվիրաբերելու համար Հայրենիքին. Մեծ ու փոքր Հայքերով, Հայկական լեռներով, Լեռնաշխրհերով ու Լեռնապարբերով... Դե՛, այսպիսի հայտագրով. «Հայկական բնաշխարհին խիստ բնորոշ բարձրաբերձ լեռներն ու բլուրները, մարդակերպ ու կենդանակերպ ժայռերն ու քարերը հիմք են ծառայել առասպելաբանաստեղծական հարուստ երևակայությամբ կերտված ավանդական բազմատեսակ դրույցների» (էջ 196): Եվ թվարկվում են՝ անձնավորումներով-Մասիս ու Արադած, Քափառ և Մուսվ, Մարութա և Անդոկ, Կերպարափոխումներով-ձիսական գոտու առասպելույթ, հովվի ու հոտի (ասել է քարացման առասպելներ), Վիշապի քարացման առասպելույթ: Ապա և «Նեմրուժ լեռան քարացած ուղտերի առասպելը»՝ հրաշապատում սլացքով ու տարբերակներով. այդ շարքում Բելի ուղտեր և ուղտապանների՝ Գ. Սրվանձտյանի գրառածը: Այնուհետև՝ Տիեզերական կարգի, Ընտանեկան-բարոյական, Սոցիալ-բարոյական նորմերի խախտումներ: Իսկ վերջում՝ «Կերպարափոխումն իբրև վկայություն»՝ սույն վերջնամասային տողերով. «... Որքան էլ քննարկված առասպելական դրույցները իրենց բովանդակությամբ կապվում են պատմական հասարակական զարգացման տարբեր աստիճանների, սոցիալական ու բարոյաէթնիկական տարբեր նորմերի հետ, այդուհանդերձ բոլորի հիմքում էլ ընկած է նախնադարյան առասպելաբանաստեղծական մտածողությունը, և մանավանդ, դրան ինքնահատուկ տրամաբանական մեխանիզմը» (էջ 256):

Այո՛, ճիշտ այդպես, ինչպես ամենուրեք գործում է բանաստեղծականի և տրամաբանականի ինքնակա-ինքնադրոշմ նույն տոհմիկ մտածողությունը:

Հայոց «անտիկյանի» տոհմիկ պատկերացումները նույնօրինակ տոհմիկ զգացողությամբ են իմաստավորվում և մեկագրություն հաջորդ «Բնաշխարհի առասպելները» և «Կեն-

դանական աշխարհի առասպելները» գլուխներում: Բուսականը՝ ծագումնաբանական առումով՝ «բոլոր բույսերն անխտիր ունեն կենդանի սկիզբ»։ Ծագել են «կամ մարդկանցից ու կենդանիներից, կամ էլ նրանց մարմնի մասերից»: Մեկը մեկից ընտիր կերպարափոխման առասպելներ՝ Հարսի լեզու և պառավի ծաղիկ, Մանուշակ, Վարդ ու Մանուշակ (քույր ու եղբայր ծննդաբանություն), Սիրի-Սիրի... Աստղափուշ... Լալա և այլն: Հատկանշական է, որ ծաղիկները մեծ մասամբ սիրային են, Սեր կոչվածին վերաբերող հասկես և դրդապատճառներով, իսկ տիպաբանական առումով էլ ունեն նմանություններ՝ ամենեին էլ ոչ պատահական. «...քանզի Ադոնիսի պաշտամունքային կենտրոններից մեկը՝ Բիրլոսը, գտնվում էր Հայաստանին սահմանակից Հարեան Ասորիքում, իսկ Ատտիսը պաշտվում էր Առաջին Հայքին սահմանակից Փոյուզիսում» (էջ 262):

Արանց կողքին «Հատկանիշների ձեռք բերման առասպելներն» արդեն մեծ մասամբ քրիստոնեական լեզենդներ են, որոնց թվում, թերես, Հետաքրքիր է Հարությունյանի արձանագրած այն մեկը, ըստ որի՝ «... Քրիստոսը քարոզելով շրջել է դաշտերում: Բոլոր բույսերը երկրպագել են նրան, միայն ծխախոտի տերևները տեղից չեն շարժվել: Քրիստոսն անիծել է ծխախոտին, որ նրա տերևները միշտ այրվեն: Դրանից Հետո է, որ մարդիկ սկսում են ծխել...» (էջ 275):

Բուսականի Համեմատությունները թե՛ քանակով, թե՛ իմաստային տարողություններով իրեն բազմազան են կենդանական առասպելները: Նախնադարյան տոտեմական աշխարհայացքի ծնունդ՝ ձևավորված նույն Հիմքի վրա և ատաղձով: Խորենացու վկայած Արծրունի տոհմանունից սկսած մեզ Հասած մեծապես փոքրացուցիչ անձնանուններում՝ Եզնիկ, Մրջունիկ... Գառնիկ... Ցլիկ... Արջուկ (ստուգաբանությունը Ալիշանի ու Զահուկյանի): Ինչպես և բանահյուսական հուշարձաններում, Հավատալիքներում, դրոշմված Հայկական լեռնաշխարհի տարբեր վայրերում (Հայտնագործված Գ. Կարախանյանի, Պ. Սաֆյանի, Հ. Մարտիրոսյանի, Հ. Իսրայելյանի կողմից) (էջ 279, 280): Առասպելներ, որոնք «Կերպարանափոխումներ և Հատկանիշների պատճառաբանումներ Հիմնախմբերով ներկայացվում են առանձին-առանձին՝ երկու բաժիններով: Կերպարանափոխումները. Մարդազայլի առասպել ըստ որի «մարդազայլի վրա ոչ մի գեներ չի բանում, նրան ոչ Հնարավոր է սպանել, ոչ էլ վիրավորել»: Պատժի տևողությունն էլ յոթ տարի... Հավատալիքներով՝ ներկայանում է առաջին բաժնում. երկրորդ՝ «Կերպարանափոխված կենդանիների և թռչունների առասպելներ» ենթաբաժինն արդեն բնութագրական է նրանով, որ «Հիմնականում մարդիկ են փոխակերպվում կենդանիների ու թռչունների և ոչ թե Հակառակը» (էջ 286): Ուշագրավ է, որ գերակշռող թռչնային փոխակերպություններն են՝ ինչպես տեսականիով, այնպես էլ առասպելների քանակով, ինչպես նշվեց Խորենացու վկայած Արծրից սկսած... Իմաստաբանությունները մեծապես Հյուսիսում՝ «Կորստյան, որոնման, վշտի մոտիվաչարով»: Ինչպես տիեզերական աստվածային մակարդակով, այնպես էլ մարդկային: Այդ թվում սիրո ձգտման մոտիվը՝ Հունական էրոսից սկսած, որին Հարությունյանը անդրադառնում է Պլատոնից ծայր առնող ուշագրավ էքսկուրսով (էջ 299–300):

Իսկ կերպարափոխված կենդանիներն արդեն, եթե սույն ենթաբաժնում տեղադրված են արջ, կրիա, կապիկ, գորտ թվաքանակով, ապա Հիմնական կենդանակազմով տիպաբանվում-բնութագրվում են «Հատկանիշների պատճառաբանումներ» տեսանկյունով. այն էլ նախնական, Հետըրհեղեղյան, աստվածաշնչյան ժամանակակարգերով: Արդեն դայլ... կից «Շները Հիվանդ (- ուժասպառ) դայլեր են» Հատկանիշով, էջը արարչական ժամանակարգի խախտման Հետևանքով, օձը «բնական օրինակարգի կամ աստվածային կամքի խախտման Հետևանքով (թռչունից օձ դարձած), նույնպիսի խախտումով Հավը կորցրել է «թռչելու» Հատկանիշը իր ամբարտապանության պատճառով, «ուղտի սապատի գոյանալը մի ա-

ոասպելով Հետևանք է առյուծի Հասցրած Հարվածները... և այսպիսի շատ ու շատ տեսակ որոշ Հատկանիշներով իմաստավորվող-տիպաբանվող կենդանական աշխարհի պատկերացումներ Համահավաք Համապատկերով... և դարձյալ Հավաքականի եզրակացությամբ ճշգրիտ ու ամբողջական. «Աստվածային պատժի Հավատալիքը գործում է ոչ միայն առասպելների քննարկվող ենթախմբում, այլև կերպարանափոխման առասպելների մեծ մասում, ուր առկա է որևէ կարգի կամ աստվածային կամքի խախտում: Հետևաբար, ընդհանուր եզրակացությունն այն է, որ յուրաքանչյուր օրինակարգ, անկախ իր բնույթից, աստվածային է, տիեզերական, ուստի նրա ամեն մի խախտում կամ զանցանք ենթակա է պատժի: Դրանով ապահովվում է տիեզերական կարգունկանոնի պահպանման Հավասարակշռությունը» (էջ 336):

Եվ այսպես, մնում է պատկերացնել առհասարակ Հայոց առասպելների ու առասպելաբանության աշխարհայացքային-իմացաբանական կշիռն ու տարողությունը: Առայժմ Հերթականորեն քննարկվող Հարցերի իրական շրջանակով՝ ներառյալ «աստվածային կամք» կամ պատիժ... որից և տրամաբանորեն թեևակոխում է գաղափարների ու սկզբունքների աշխարհափոխիսոփայական վերացական ոլորտ: Երկվության և երկհակադրության գաղափարի Հակադիր, Հաճախ արյունակից երկվորյակներ. տիեզերք ու քաոս, Հուր-Չուր, լույս ու խավար... բարին ու չարը... յուրայինն ու օտարը... քննական բովանդակությունը մենագրության «Երկվորյակների առասպելները» յոթերորդ գլխի, որը հենց սկզբից, ըստ Հարկի, սրամտորեն մատուցվում է երկվություն-երկհակադրություն խորհրդանշող Հանելուկով. «Ի՞նչն ա, որ էրկու ա». որի պատասխանն է. «Երկինք-երկիր, արեղակ-լուսին, դրախտ-դժոխք» (էջ 338):

Ըստ այդմ. «Հայկական առասպելներն ու նրանց Հիմնական մոտիվները» ենթադրվում մի շարք երկվորյակների առասպելների բաղադրություններ սահմանվում է Հիմնական երկու մակարդակ առասպելաբանական և վիպական-պատմական: Համապատասխանաբար վկայակոչվում է երկվորյակների «տիեզերական վաղնջական պատկերացումներից մեկը»՝ Ան. Շիրակացու Հիշատակած 12 կենդանական Համաստեղությունները՝ ըստ տարվա չորս եղանակների երեքական աստղատուն՝ չորս խմբով (նույն տեղում): Համապատասխանաբար դիտարկվում են Արև և Լուսին վաղնջական գրույցները՝ մեծապես տարասեռ անձնավորումով և դրանց միտող այլք. ի մասնավորի Հուր ու Չուր տարբերակը: Ուշագրավ է, որ երկակի (սպիտակ-սև) գույն շներ Հակադրությամբ՝ Հարությունյանը նույնպիսի միտում է վերծանում և Արտավազդի Հանրահայտ առասպելում: Խորախորհուրդ Հանգույցներով ու լուծումներով դիտարկում-վերծանումները շարունակվում են այս դեպքում էլ սույն Հարցադրումներով. երկվորյակների ծագումը կամ ծնունդը. Կերպարների Հակադրություն. Հակադրություն ծնողների (Հովանավորողների) և երկվորյակների միջև. Փախուստ և Հալածանք տնից, Հայրենի երկրից... Սասնա ծռերի, Երվանդի ու Երվազի... նույն Արևի ու Լուսնի... Բզզոխ և Մամդուն եղբայրների... պահպանված Հնօրյա վիպասքում և այլ գրույցներում:

«Հայկական առասպելների ընդհանրություններն ու առանձնահատկությունները» ենթադրվում արդեն Համադրական-քննական է մեծապես Հնդեվրոպական առասպել-առասպելաբանությունների Համեմատությամբ: Երկու առումով էլ սկզբնաղբյուրների նորանոր Հավելումներով: Վերստին դիմենք կցկտուր ծաղկաբազի՝ ինչպես «ձիային ծագման» Հետկապված ազոտ կամ ակնհայտ Հետքերի քննությունն է՝ Հնդկա-Հունական «ձիածին առասպելների» Հարաբերակցությամբ... որտեղից և Հետազոտողն անցնում է կանանց և ջրի երկվորյակներին, ապա և Թուրք մանուկներին... Միայն Հետևել է պետք Հարությունյան Հետազոտողի կուահումների, ճշտումների շղթայական խոյանքին՝ ճաշակելու-վայելելու

Համար այդ և այլ ամենի իմացաբանական-բանաստեղծական Հարստությունն ու Հմայքը: Վկայաբանական տարածքով Ապոլոնի և Արտեմիսի մայր Լետոյից, իտալական նույնատիպ երկվորյակներից իմաստաբանական աղբրաներով թևածելով մինչև Ծովինար... մինչև Թուխ մանուկ... ժայռապատկերներից, Հայաստանյաց երկու Հատվածներում տարածում գտած զերեզմանների վրա, աղբյուրների մոտ կառուցված մատուռներ, Թուխ մանուկների ուխտագնացություններ սրբավայրեր՝ «օգոստոսին» ս. Աստվածածնի տոնին, որ դարձյալ Հավաստում է նրանց կապը Տիրամոր (Հին մայր աստվածության), այսինքն՝ մայրության ու պողաբերության գաղափարը մարմնավորող դիցուհու Հետ: Առավել ևս ժողովրդական երգեր:

Մեռնիմ քրդի սըբ Թուխ-Մանուկ,
Ճուղ ճուղ կորեկ թորկես կայնուկ:

«Թուխ» հոլովումների ու մակդիրների, խորհրդանիշերի, կոչականների, գոյականների մի անասելի «բազմաշատությունն ու լայն տարածում»... «անձրևաբեր Թուխ ամպ», «Երկու Թուխ, աղվոր աղջիկ», «Թուխ, ամ ծոցուտ գին Հրամես», «Թըռչել, Թուխին դուռն էր իջէր», «Թուխ ալ չունէր, որ զայն բերէր»... Լ. Մարտիրոսյանից ու Լ. Իսրայելյանից և մեծապես Ա. Մնացականյանի Հետազոտություններից վերաքաղած, այլև սեփականով Հավելած. «Թուխի» յուրօրինակ տարափով էլ վկայաբանական հղումներով Հարությունյանը Հմտորեն իմաստաբանում-ընդհանրացնում է մեկնությունների այսօրինակ շերտեր. «... «Թուխ» ոչ միայն մանուկ-կտրիճներն են, այլև նրաց սիրահետած աղջիկները, նրանց իգական գուգորդները, և դուռնային առումով Համասեռություն է ստեղծվում այդ տարասեռ գուգերի միջև, այդ գուգին կամ գուգերին դարձնում միևնույն երևույթի տարասեռ անձնավորումներ»:

Եվ ապա. «Թուխ» անվանն առհասարակ առասպելաբանաստեղծական մակդիր է, որ Հաճախ է Հանդիպում ժողովրդական բանահյուսության մեջ: «Սասնա ծռերի» պատումներից մեկում Սանասարը փոխաբերված է Թուխ կամ սև ամպի կերպարով... Սանասարն ինքն է իրեն «Սասնա սև ամպ» անվանում Պղնձե քաղաքի ծերունու Հետ խոսելիս... ծովի փոթորկելուց և քաղաքի վրա ջուր տեղալուց Հետո: «Թուխ ամպ» պատկերը Հաճախ է Հանդես գալիս Հայ Հին ու նոր ժողովրդական երգերում՝ կապված ցողացող անձրևի Հետ («Թուխ ամպեր և՛ անուշ կու ցողայ», «Թուխ ամպեր, մանր անձրև» և այլն) (էջ 354-355):

Հիրավի, հոլովով տարափով Հայոց «Թուխ մանկաց» օրհներգություն, որի այիքով բանաստեղծականը առկախվում, և նույն այիքի վրա ամրագրվում են մեկը մեկից Հետաքրքիր գիտական Հայտնություններ:

Հաջորդ «Մեռնող-Հառնողի առասպելները», բնականաբար, ծայր են առնում բնութագիր-սահմանումով «մեռնող-Հառնողի» բուն գաղափարի՝ բնության ցիկլային փոխակերպման բնույթով ու օրինաչափությամբ՝ նաև տոմարաօրացուցային խմբով: Ըստ այդմ մեռնող-Հառնող արթնացման կենսաբանական երևույթը սկզբնապես դիտարկվում է բուսական աշխարհի փոխակերպումներով, ընդ որում՝ դիտարկվողը ցորենն է (Հացը), որ վկայվում և վկայաբանվում է մեծապես Հանելուկներով, Հանելուկային բազմապիսի այլաբանություններով: Մեկը մեկից Հետաքրքիր ու գրավիչ: Քաղենք այս մեկը.

Թուրով թրատեցին զիս,
Սուրով սրատեցին զիս,
Մեռա ես, կորա ես,
Առաջի տարին ելա ես... (էջ 357-362)

Իսկ Հանելուկների այլաբանությունների վկայաբանություններն արգեն «Հացի գո-
Հացման արժեքով», քրիստոնեական պատգամներով, ծիսակարգային տարբերակներով,
անձնավորումներով, առասպելաբանությամբ, «մեռնող-Հառնող Ազոնիս-Թամմուզ, եգիպ-
տական Օղիրիս և փոյուզիական Ատտիս»... Համեմատություններով... պարզապես կա-
տարյալ են թե՛ իմաստաբանությամբ և թե՛ մեկնություններով. և մանավանդ սույն «Յոթնե-
սի Հանելուկաչարը» ենթադրելի ուշադրավ վերջնամասով, «...Հայկական Հանելուկի միջնա-
դարյան տարբերակը (արևորդիների աղանդի՝ Ալ. Ջ.), Հորինված լինելով Հայրենի չափով,
միջնադարյան տաղարաններում գրվել է նաև երգերի շարքում, և Հավանաբար երգվել:
Իսկ Գր. Նարեկացու Հայտնի վկայությունից դիտենք, որ Հայոց Հին սգերգերը Հորինված
են եղել Հայրենի չափով: Այս Հանգամանքները կարող են Հիմքեր տալ ենթադրելու, թե
իբրև անկախ երգ Հանդես եկող Հանելուկի Հայրենի չափով Հորինված միջնադարյան տար-
բերակը՝ գուցե Հենց Միջագետքի Հայ արևորդի աղանդավորների միջավայրում երգված
լինի իրրև սգերգ՝ նվիրված ցորենի ոգու զոհաբերությանը. ճիշտ այնպես, ինչպես Եղեսիա-
յի ասորիներն էին ողբում իրենց ցորենի Հին աստծո՝ Թաուզի սպանությունն ու անլուր
չարչարանքները»: Եվ տակավին 1969-ին արտահայտած իր սույն միտքը շարունակելով,
Հարությունյանն ամրապնդում է լրացուցիչ նոր վկայությամբ: Գրելով. «Բացի այս, ինչ-
պես տեսանք, Հանելուկի Հայկական տարբերակները մոտիվների նույնությամբ ու նմա-
նությամբ առավել Հարագատ են ուղարկված բնադրին, քան Հանելուկի ասորական վար-
կածին: Սա ևս պատահական լինել չի կարող, քանզի ուղարկված բնագրերում Հանդիպում
է Արա դիցանունը, որ բառացի նշանակում է «Հունձ», և ինքը Հենց Հնձի աստվածույթ-
յունն է (տե՛ս Никольский 1946, 29): Իսկ Արան, ինչպես Հայտնի է, Հին Հայոց մեռնող-
Հառնող բուսական աստվածությունն է» (էջ 364–365), – հաստատում է Հարությունյանը:

Ինչ վերաբերում է Հաջորդ՝ «Արա գեղեցիկի առասպելը» ենթադրելի «Շամիրամի կեր-
պարն ու Հատկանիշները» և «Արա Գեղեցիկի կերպարն ու Հատկանիշները» բաժիններով,
խոստովանանք լինի, կարելի է թե սրբապղծություն Համարվի կիսատ-պոատ անդրադառ-
նալը: Պարզապես հնարավոր էլ չէ Նիկ. Ադոնցից վկայակոչվող՝ «...Շամիրամն իր հոյա-
կապ փառքի Համար պարտական է «ոչ թե պատմական Շամմուրամի» «դժգույն ուրվա-
կանին, այլ Հատկապես այնքան ժողովրդական աստվածուհի Իշթարին» (էջ 366), – ելակե-
տից ծավալվող Հարությունյանի լայնահուն վկայաբանությունների պատճառակցական
պիրկ շղթայից շրջանցել որևէ ուղակ: Աքաղական Իշտար, «Գիլգամիշ» առասպելաբանա-
կան վեպ... Խորենացի... Հերոդոտ... Դերկետո... վերստին Ադոնց՝ «Մեծ մոր պաշտա-
մունք», Պլատոնի էր... Ղափանցյան, Դյակոնով՝ Արալեզ..., Աճառյան, Զահուկյան...
վերստին Խորենացի և Բուզանդ... Եվ կերպարային, Հատկանշային, արալեզա շնային բոլոր
տվյալներով ու առումներով վերից վար Հակապատկերը՝ ընդունված առտնին-առօրեական
տափակ ըմբռնումներ... Իրոք, գեղարվեստական արծարծումների որպիսի գանձ:

Հայ ժողովուրդը ևս ունեցել է հոգու և Հանդերձյալ կյանքի Հավատալիքներ. նախնա-
կան ըմբռնումով շունչ, հողի կամ ոգի. նույնիսկ «Հոգին փչել», Հանել, տալ կապակցութ-
յուններով: Պատկերացումներ, որպիսիք «Մահվան և Հանդերձյալ կյանքի առասպելները»
վերնագրով մենագրության մեջ ներկայացված են՝ «Մահվան պատկերացումները: Քուն»,
«Մահվան անձնավորումները», «Հանդերձյալ կյանքի պատկերացումները» ենթադրելի են-
բով: Եվ այսպես ըստ Հարությունյանի մեկնության, եթե «Քունը իրրև ժամանակավոր
մահ» Հավատալիքներում ամենօրյա «քուն-արթնացումով» սովորական է, և երկարատև
կամ Հանդերձյալի է վերածում Մեծ կամ Սև մակդիրներով, ապա վիճակն այլ է «Մահվան
անձնավորումների» պարագայում: Երբ Հանդես է գալիս իբրև Մահ շնչավոր էակ («Մահը
քե տանի»): Գրող՝ ամենատարբեր, ասես, սահման չունեցող պատկերացումներով և ընկա-

լուծմանը: այդ թվում «Աստծո հրամանով... նորածնի բախտորոշումը, որը Գրողը գրում է նրա ճակատին իբրև հրամանք կամ ճակատագիր» (էջ 393) ... վկայված-վկայակոչված ավանդություններում, հայրեններում, ծիսաառասպելական երգերում...

Հետադուրդը Հարությունյանի իմացությունների անծայրություն, բանահյուսության ամենատարբեր ժանրերի խորքային հարստություններ պեղելու և վեր հանելու կարողություն հասցնելն կրկնած զարմանալին պետք է որ վերստին կրկնենք... այս դեպքում ևս՝ լուծումները թողած, բավարարվելով հարցադրումներ թվարկելով: Ինչպես «Գուրի Հոգառի Հետ: Գարրիել հրեշտակ», «բարի և չար ոգիներ», «գրախոս և դժոխք»: «Մաղե կամուրջ», «Հոգիների ուղևորումը հանդերձյալ աշխարհ և նրանց դատաստանը» ... այլև կախարհներ, այլև՝ «Գրողի բրդուճ, Մահ ու Գրող»... «Մեծ աղբեր»...

Ինչպես տեսնում եք, «անտիկյան» հայ ժողովուրդը Հարությունյանի գրչով թևակոխել է այդ ժողովրդի ինքնակա վերացական-միստիկ պատկերացումների ոլորտը: Որով և «Կատարածաբանական առասպելները» վերնագրով վերջավորվում է մեծագրությունը: Վերստին բոլոր առումներով հետաքրքիր քննական հարցադրումներով ու լուծումներով: Որոնցից առաջինը «ժամանակ»՝ Հիշարժան է ու խորհրդանշական, որ Հարությունյանի ազնվագույն զղածություն թելադրանքով ծայր է առնում Աբեղյանով. ճիշտ այսպես. «ժամանակ: «Հրմեն բան վախտին կը կանի (կը նայի), վախտը ըսկի բանի չի կանիլ» (Աբեղյան, է. 48)– հավասարում է հայկական առածը՝ շեշտելով ժամանակի մշտնջենականությունը և գերակայությունը աշխարհի իրերի և երևույթների համեմատությամբ: Այս հարակա ժամանակը հայ ավանդության մեջ անձնավորված է ալեհեր ծերունու կերպարով, որ կրում է ժուկ ու ժամանակ բաղադրյալ անունը»: Հայոց տոհմիկ պատկերավոր մտածողությամբ այսպես է առարկայացվում ժամանակ հասկացությունը, որ վկայաբանորեն իրավամբ համեմատվում է «իրանական ժամանակի և ճակատագրի աստված Ջրվանի կամ Ջրվան Աքարանայի (անվախճան ժամանակ) Հետ, որոնք երկուսն էլ ալեհեր ծերունիներ են, բազմում են երկնքում (ժուկ ու ժամանակի նստավայր բարձր լեռան գագաթը իբրև երկնքի խորհրդանշի) և իշխում աստղազարդ երկնքի պտույտի վրա, որը և՛ ժամանակի շարժումն է, և՛ ճակատագրի պատկերացումը իբրև երկնային անիվ Ջարխի Ֆալաք» (տե՛ս Աբեղյան, է. 47–48, Մելիք-Օհանջանյան, 312–314) (էջ 443):

Ապա հետևում է Ջարխի Ֆալաքի ստուգաբանությունն ու ըմբռնումը՝ իբրև մոլորակային երկինք, իբրև բախտ տնօրինող աստվածություն պահպանված անեծքներում, այլև հակառակ պտույտ, բախտը թեքվելու իմաստով՝ ինչպես Սայաթ-Նովյան դարձվածում «Ջարխի-փալազըն միգնից խըռովա»: Հաջորդում է Արտավազդի առասպելը. Խորենացու և Եզնիկի տարբերակների և այլևայլ վկայաբանությունների համադրվող քննական իմաստավորումներով, և ապա համեմատությամբ վրացական Ամիրանի, Շիթարի, Լոկի-Լուցիֆերի, ինչպես և ծիսականացմամբ՝ այն էլ դիմակավորված ու թատերական:

Ըստ հարկի ավելի ծավալուն է «Մհերի առասպելի» քննությունը՝ տիպաբանական-վախճանաբանական-ծիսական դիտարկվող հստակ առումներով. «վերջին արդար և անաչառ դատաստանի» գաղափարով և փրկչաբանական մտահայեցողությամբ: Համապատասխանաբար շրջանառության են կոչվում «Սասնա ծռերի» տարբերակներ, հանելուկներ... Սրվանձոյանց, Мухом, Widengren, Cumont ... Աբեղյան և այլք: Ըստ այդմ վկայաբանական շրջագծով ու դարձդարձումներով հետևում են ընդհանրացումները. ինչպես այս մեկը. «Հոգիների վերջին դատաստանի և փրկություն այս գաղափարը շատ կողմերով փոխանցվում է քրիստոնեությանը, և Միհր-փրկչի փոխարեն հանդես է գալիս Քրիստոսը, որպիսին առկա է և մեր վեպում»: Կամ հաստատական այս մյուսը. «... Մհերն, ուրեմն, շատ է մեր-

ձեռնում Հացահատիկն անձնավորող մեռնող-հառնող աստվածություններին» (էջ 457, 459) սոցիալական շեշտադրումներով Հանդերձ:

Մհերի առասպելավկայաբանությունը շարունակվում է և «Փրկիչ, վերջին դատաստան և Հայոց վիպական ավանդությունը» հարցադրումով: Ուստի այդ առումներով իմաստաբանական-ստուգարանական դաշտով վկայակոչվող աղբյուր-սկզբնաղբյուրներն արդեն, ինչպես ըստ հարկի մենագրության բոլոր գլուխներում, – մեծապես միջազգային ճանաչում ունեցող օտարալեզու են Widengren, Фрай, բազմիցս Мифы, I, II, Дрезден... բայց և բազմակի հղումներ Աստվածաշնչից... Ազգագրական Հանդեսից... այդ թվում «Ուռնայի կալի մոտիվի» չափազանց հետաքրքիր քննության առնչությամբ՝ Սայաթ-Նոփա «Վուր չէ Ուռնիչիլի նման կալ անիլըն ինչի՞ն է շահ» և այլ տողերի վկայակոչումով եզրակացություն ըստ որի «Սայաթ-Նոփայի... տողերից պարզվում է, որ «Ուռնայի կալ» հասկացությունը, իբրև արդարություն խորհրդանիշ, թեպետ ոչ ուղղակի, դարձյալ աղերսվում է վերջին դատաստանին»:

Բնականաբար հնօրյա և ուշ Ավեստաններ, Բունդահիշնա ցիլլերով... Միթրա-Միհրի պաշտամունք... «բաղձալի արքայություն» ու դրախտային վիճակի երազանքով. և այդ ամենի համադրական եզրահանգում «... Սասնա ծռերն» իր վիպական ամբողջությամբ իմաստաբանական սերտ աղերսներ ունի հին իրանական (նաև հնդեվրոպական) կատարածաբանության հետ» (էջ 466, 476):

Տրամաբանական կուռ ընթացքով ըստ հարկի վկայաբանական շարքը կրկնվում է և «կատարածաբանական առասպելները» քննարկվող սույն, ինչպես և ամբողջ մենագրությունը վերջավորող «Նեո» հասկացության իմաստաբանության դեպքում: Միևնույն «վախճանաբանական ընդհանուր հավատալիքների վրա ձևավորված» Նեո Հայկական յուրօրինակ անունով և ծագումնաբանությամբ: Որը և հաստատել-վիճարկել-հերքել-հաստատելու իր դիտական վկայաբանական հմտությամբ ներկայացնում է Հարությունյանը: Տվյալ դեպքում ելակետ ունենալով համաքրիստոնեական ընդհանրականը. այն է թե. «Հայոց հավատալիքներով՝ աշխարհի վախճանին հանդես է գալու Նեոը, որը համաշխարհային չար ողու մարմնավորումն է: Հայոց Նեոը նույնանում է քրիստոնեական կատարածաբանության այն կերպարներին, որոնք հանդես են գալու ժամանակների վախճանին, Հիսուս Քրիստոսի հակառակորդներն են և հիմնականում կոչվում են մեկ ընդհանուր անունով՝ Հակաքրիստոս... կամ Դերաքրիստոս: Նա աշխարհի վախճանին գլխավորելու է պայքարը Քրիստոսի դեմ, բայց և պարտվելու է նրանից... Նա Տիեզերական ինքնակոչ բռնակալ է Քրիստոսի դիմակով, որին նա մերժում է և ձգտում Քրիստոսի տեղը գրավել: Դերաքրիստոսը հանդես է գալիս իբրև խաբեբա, կեղծավոր, բարեգործ Քրիստոսին պատճենավորող, կեղծ հրաշագործությամբ Քրիստոսի հրաշքները պատճենող»:

Ասել է թե՛ այս ամենի մարմնավորողն է և Հայոց Նեոը, որի ծննդաբանությունը՝ վաղ քրիստոնեական թարգմանական թղթերի վերծանումով, Հարությունյանը հաստատում է թե՛ «...փաստերը ցույց են տալիս, որ Նեոի արարքներն ու գործառույթը Հայ ավանդություն մեջ սերում է Նոր կտակարանից» (էջ 478, 480): Հետևում է Նեո անվան վկայաբանական ճշտումը վերստին քրիստոնեական առաջին գարեբից սկսած՝ հաստատում-հերքում, վիճարկում-վերծանումներով: Ընդ որում ելակետ է ծառայում Ալիշանի տեսակետը նախ ընդհանուր՝ այսպես ասած երկդիմի, երես-աստառային «չեզոք» տեսքով: Ապա հաջորդում է Թագ. Ավդալբեդյանի պատմական բնույթի հակափաստարկը, որի համաձայն բացառվում է Նեոի կամ Նեոնի ծագած լինելը Ներոնից, որքանով տակավին քրիստոնեություն չընդունած Հայերը պատճառ չունենին դժգոհելու Ներոնից, հակառակը՝ «Ներոնը խաղաղություն բերեց Հայոց երկրին»: Ըստ այդմ Ավդալբեդյանի կարծիքով Նեոնը ծագել է Մհեր ա-

նունից»։ Եվ հենց այստեղից էլ ծայր է առնում հաստատում-հերքման վիճահարույց նոր օղակը՝ Հարությունյանի մենագրության սույն և մյուս գլուխներում հիմնավորապես վկայաբանված գիտական կովաններով. ամփոփ այսպիսի տողերով. «... Մհերի առասպելի գրեթե բոլոր տարբերակները ժողովրդական մեկնաբանություններով քննարկեցինք վերևում ձիշտ է, Մհերի կերպարում առկա են որոշ չար ու կործանարար գծեր. բայց... բնավ նրան չի կարելի նույնացնել Նեոի հետ։ Ընդհակառակը, նա օժտված է առավելապես փրկչի. նոր աշխարհի ավետաբերի գծերով, քան չար ու կործանարար Նեոի» (էջ 480–481). և հնչյունաբանական աղավաղումներով Նհեր հաղվագեպ անվանաձևը գիտական հիմք չի նույնացման։ Այստեղից էլ վիճարկելով վերադառնում է Ալիշանի այն ճիշտ կուսմանը՝ «...թե Նեոն անվամբ չար ոգի մը ճանչված պիտի ըլլա առ Հայս հին ատեն, և մեր թարգմանիչք այնով կոչած են զդերաքրիստոսն, որպես կոչեն ուրիշ ազգք և լեզուք. և մերին նման առնուն չունին...»։ Դրան Հարությունյանը ավելացնում է. «Որ Նեոն անունը հին է, և, ինչպես Ալիշանն է նշում, հեռավոր նմանություն ունի Առնակի անվան ու գործի հետ... միանգամայն ճշմարիտ է։ Թե՛ Նեո և թե՛ Առնակ (հատկապես «առնակավոր շուն») անուններով են կոչում խիստ չար երեխաներին, մասնավորապես «Նեոան ձագ», «Նեոան պտուղ», «Նեոի ծնունդ» կապակցություններով (հմտ. «Սատանի ձագ», «Սատանի պտուղ», «Սատանի ծնունդ» պարսպական բանաձևերի հետ)» (էջ 481)։

Էպպես Ալիշանի սույն կուսումներով էլ վերջավորվում է Սարգիս Հարությունյանի մենագրությունը։ Հիրավի, խորհրդանշական ավարտ...

Պատմականության գաղափարի հիմնավորման ընթացքներով փիլիսոփայության ու կրոնի կողքին անդրադառնալով գեղարվեստին՝ տեսակներով ու ժանրերով, շեգելն արձանագրում է, թե՛ գեղարվեստի ստեղծագործության մեջ «ժողովուրդները պարփակել են իրենց ամենաբովանդակալից հայեցություններն ու պատկերացումները, հաճախ գեղարվեստը բանալի է, իսկ որոշ ժողովուրդների դեպքում միակ բանալին է՝ հասկանալու համար նրանց իմաստությունն ու կրոնը»²։

Հայտնապես, օրինական հպարտությամբ ու ակնածանքով շեշտենք, որ պատմականության գաղափարի հաղթանակին ուղեկցող և մեծապես ժողովուրդների հնօրյա բանահյուսությանն ու լեզուներին վերաբերող Պատմահամեմատական դպրոցի հանգանակները իրապես փաստացի հենց բուն ակունքից արձագանքել-որդեգրել ու սերմանել-արմատավորել են Հայր Ալիշանն ու Խաչատուր Աբովյանը։ Սերմանել-արմատավորել են հետագա տնօրինությունը պատգամել-ավանդելով սերունդներին, որից և, ինչպես տեսնում ենք, վիթխարի բաժին է վիճակվել մեր ժամանակի օրինական ժառանգորդին՝ երիցս երախտավոր բանագետ Սարգիս Հարությունյանին... Որը և հայոց «անտիկյան», միջնադարյան և նորդարյա բանահյուսական տեսակների ու ժանրերի՝ այլևայլ ազգերի ու ցեղախմբերի մշակույթների հետ համեմատական-քննական վկայաբանությամբ ու մեկնությամբ միմյանց հաջորդած առանձին ժանրերի նախորդ հանրահայտ ուսումնասիրությունների արդյունքում ստեղծեց «Հայ առասպելաբանությունը» խորագրով սույն դասական համալիր մենագրությունը. օրինականորեն կոչված ուղեկցելու և ծառայելու հավասարապես թե՛ հայոց մշակույթին, թե՛ մարդկության... հավիտենական բարի երթով... Մանավանդ որ նույնպիսի երթի է սպասում և Միք. Նալբանդյանի «Մենք... Իբրև ազգ անտիկյան ենք...» նշանաբանապատգամով ստեղծված Հարությունյանի «Հայոց հմայական և ժողովրդական աղոթքները» հերթական ուսումնասիրությունը։

Ուրեմն և կրկնակի-բազմակի բարի երթ։

ԱԼՄԱՍ ՋԱԲԱՐՅԱՆ